

四庫全書

集部

欽定四庫全書

集部
松泉集卷一至五

主事_臣汪彥博覆勘

武英殿纂修原任編修_臣吳裕德

御製汪承霈進其父由敦詩文集因題句當序

時晴書早壽茗華

汪由敦書法秀潤久直內廷戊寅歲命翰臣等排次進呈墨蹟為十冊

勅上石名曰時晴齋法帖

子舍茲呈遺藁嘉詩與古期歸雅正文非

時調去浮誇席前我偶懷賈誼書讀爾休慙趙奢舊日

西清劇談輩祇今誰在惹咨嗟

欽定四庫全書

御製詩

恩綸

御賜吏部尚書汪由敦卹典

制曰吏部尚書汪由敦老成端恪敏練安詳學問淵醇
文辭雅正簡任部務供奉內廷夙夜在公勤勞匪懈前
以偶撓寒疾當命加意調治並賜醫藥以冀速痊忽聞
溘逝深為軫悼即日朕親臨祭奠茶醎著加贈太子太
師入祀賢良祠並准其入城於賜第停設賞內庫銀二
千兩經理喪事所有應得卹典仍著該部祭例具奏欽

此

御製哭汪由敦詩

贊治常資理論文每契神在公誠匪懈卽世信何因言
行遺編簡老成謝縉紳奠臨攄一痛底計日當辰

御賜祭文

地參密勿倚黼黻之良才職總銓衡眷老成之令望惟
蓋誠既昭夙夜斯渥典宜備哀榮爾吏部尚書汪由敦
端方植品格慎提躬績學通經早負士林之譽舒文華

國預儲公輔之材直誦幄以簪毫由坊寮而進秩朝論
交推其手筆朕心實契其本原簡侍禁廷屢加獎擢秩
宗典禮佐夏卿而歷地卿邦土考工領憲部而躋銓部
攝司風紀參預樞機更七卿而懋績克勤承三接而小
心益勵嘉乃在公之素副予委任之衷修詞必居要為
先爾更歸於醇正剖事尚如流之美爾獨處以安詳久
典綸言常資贊治每當幾暇靜與論文方藉宣勞何圖
適疾時詢病狀尚賜藥以冀瘳遽軫哀聞更親臨而抒

慟賜內帑以申賻晉宮銜而祀賢良爰命所司載頒
諭祭嗚呼綜生平之言行汗簡傳聲薦此日之莖芬泉
壚增寵爾靈不昧尚克歆茲

御賜入賢良祠祭文

任隆贊治倚黼黻於良臣禮重酬庸沛恩施於秩祀蓋
文章政事常宣夙夜之勞斯建几牲醪宜肅春秋之典
寅清載飭渙汗重申爾吏部尚書汪由敦體國知宜立
身有本早負清華之望選列詞垣式孚潤色之才榮依

講幄由宮坊而掌乎四譯躋論閣而領及六曹佐我秋
宗兵農亦資其作貳持予邦典秋冬先畀以專官啟歷
則卿月咸周紀綱則法星兼總以爾學成端雅爰擢侍
於禁廷以爾謨裕老成乃俾承夫密勿惟爾益懋乃績
務殫厥心參預樞機出納皆知其欽若典司制作托揚
具稔其深醇羽可為儀度允推於朝右文原載道論每
當於朕懷當百度之紛投定而能靜閱廿年如一日
始克有終洵言之可傳必哀榮之大備賚頌內帑特

優賜卹之儀寵溢如綸用錫晉階之命勒貞珉以光吉
壤披冊府而易嘉名更昭稠疊之恩永展賢良之祭於
戲檐楹丹雘一時竝煥於鼎鐘俎豆馨香百世同芳於
竹帛布茲渥澤庶爾歆承

諭墓原任吏部尚書汪由敦碑文

朕惟靖共夙夜眷碩望於耆英風勵聯常獎成勞於簡
冊矧其荷鈞樞之寄宣出納之猷宜賁絲綸用光來葉
爾如贈太子太師原任太子太傅吏部尚書汪由敦學

有經術才為國華策名膺載筆之榮蔚然清望挾藻本
有章之美卓爾儒珍由禮寺而命直內廷歷綸扉而擢
居卿貳俾司邦土克若汝工載掌秋官罔干予正攝風
紀臺垣之任參論思密勿之班惟爾業在維勤志存有
恪侍禁近者廿載彌著小心更啟歷者六曹聿昭令
績晉三階而寅亮繼百職以持衡晝接敷陳每見安詳
之度幾餘探論實嘉雅正之風持躬則言行靡愆體國
則初終匪懈倚毗方資其翊贊楷模允式夫縉紳疾疾

忽聞動息皆關厯念參苓莫效軫傷特為親臨爰優賻
贈之儀載錫宮銜之寵秩之禋祀頒殊禮於賢良謚曰
文端稱平生之梗概於戲老成云謝鼎鐘留黼黻之勲
汪濊重申琬琰煥松楸之色欽予懋典貽爾後昆

原傳

錢維城撰

汪由敦字師茗安徽休寧人幼穎異讀書目數行俱下初名良金十歲就試不售改今名徽人商杭者令甲別立商籍由敦年十九遊浙中循例入試補錢塘縣學附生故又為錢塘籍時徐元夢撫浙江聞其名延至幕中繼元夢入為工部尚書由敦以國子監生偕入都雍正元年疏薦引

見充明史館纂修官故事史局編纂例用詞臣由敦以

諸生被

命時論榮之二年三月舉順天鄉試八月成進士改翰林院庶吉士散館授編修十年充日講起居注官十一年四月授右春坊右中允八月授翰林院侍講十三年轉侍讀

皇上初即位授提督四譯館太常寺少卿仍兼講官館卿向無兼記注者由敦以文學夙為

上所知故有是

命乾隆元年入直

南書房授內閣學士二年會御史劉元燮以風聞具
劾降翰林院侍讀學士五年仍為內閣學士六年
授禮部左侍郎調兵部左侍郎八年充

經筵講官九年轉戶部右侍郎授工部尚書轉刑部尚
書十一年兼署都察院左都御史旋入直軍機處
丁卯戊辰之間金川方用兵羽書旁午

皇上睿謨廣運燭照萬里之外指授方畧日數千百言

由敦視草援筆立就無不當

上意十四年金川平加軍功三級旋加太子少師協辦
大學士俄以代原任大學士張廷玉陳奏事革職
畱尚書任自效十五年復任尚書夏六月永定河
決固安奉

命往勘籌議堵禦悉合機宜會四川學政朱荃以墨敗
由敦曾舉荃典試復革職仍理兵部侍郎事自贖
是年冬

特恩蔭一子分部學習十六年補戶部右侍郎復奉
命勘永定河時積水為患有言宜別開新河歸海者由
敦徧歷沿河州郡度地形勢議以暴水為患由河
身淤淺第濬之當自息別開新河未見其利日久
復淤無益又當壞民田廬無算宜仍舊便奏上

報可十七年授工部尚書十九年加太子太傅兼理刑
部事二十年轉刑部尚書叙平準噶爾功得軍功
加三級自準噶爾出師以來由敦偕同事諸臣晨

夕進見日數四時或扈從

召對帳殿亦如之其勞與金川時同二十一年轉工部
尚書兼署吏部事二十二年轉吏部尚書二十三
年正月卒於官年六十七謚文端由敦學問淹貫
於書無所不窺為文章典重有體詞約而旨深少
負重望自以諸生直史館當時即以公輔期之及
官翰林

朝廷大制作必屬之一時奉為矜式其他碑版序紀

及古今體詩俱為時所傳誦有詩文集若干卷行
於世尤嫻歷代掌故前後考定樂章祭器鹵簿及
朝會升祔諸大禮皆斟酌古今釐然為一代制為
人沉靜寡言笑喜愠不少見於色遇事有識默定
于中不以議論捷給相尚當羣言紛沓徐出一語
聞者厭心以為不可及也氣度端凝整暇極倜傥
中亦從容不失條理雖以文學受

主知而簿書錢穀刑名法律之事亦無不究心焉性尤

慎密每有贊畫絕口不言雖子弟親戚不使知

上由是益倚任凡塞外

行圍及四方

巡幸必以由敦從

恩禮錫賚不可殫紀而由敦益小心敬慎竭力奉職無
少懈卒以勞疾不起

皇上親臨其喪哭之慟

賜陀羅衛以殮

命內務府大臣理其喪復

諭內閣曰吏部尚書汪由敦老成端恪敏練安詳學問淵醇文詞雅正簡任部務供奉內廷夙夜在公勤勞匪懈前以偶撓寒疾當命加意調治並賜醫藥以冀速痊忽聞溘逝深為軫悼即日朕親臨祭奠茶醕著加贈太子太師入祀賢良祠並准其入城於賜第停設賞內庫銀二千兩經理喪事所有應得卹典仍著該部察例具奏大臣禮遇之隆近罕其比論者亦以由敦為當之不

愧焉由敦尤工書卒之後

皇上命裒輯勒石凡十卷筆法深穩端勁如其為人

都察院左副都御史臣汪承需奉

勅恭和

御製元韻

曉捧

宸章浥露華先臣叢稿荷

褒嘉以詩為序

奎文煥奉

勅成編藝苑誇未讀父書慙每積幸邀

天語願誠奢從今隻字須珍
弄梨棗應無散軼嗟

都察院左副都御史

臣

汪承霈跪

奏竊

臣

父原任吏部尚書

臣

汪由敦以寒畯書生早

年力學迨遭際

昌期策名翰苑仰蒙我

皇上非常知遇入直

禁廷授簡簪毫得以親承

指授備叨

啟迪益凜鑽研每應

制賡吟奉

勅撰述積時既久篋草多存常語臣等以文章一道向

來未涉津涯自荷

聖訓提撕稍知軌範擬加錄弄敬識

陶鎔未及纂排僅餘叢稿臣蠢愚失學不能繼續父書

每念臣父一生覃思學古幸得奉

聖主為師資實儒臣未有之遭逢庶藉遺編永昭

愚遇不揣冒昧輒將臣父臣汪由敦詩集二十六卷文

集二十卷按年編次謹繕寫清本裝潢成帙恭呈
御覽伏祈

皇上訓示

臣

無任悚息待

命之至謹

奏

欽定四庫全書

奏摺

都察院左副都御史臣汪承霈跪

奏為恭謝

天恩事竊臣於本月二十四日謹將臣父汪由敦詩文稿繕寫進

呈蒙

恩賜

御製詩當序臣跪讀之下感激涕零莫可言喻伏念臣

父久直

禁廷備邀

隆遇沐

君師之洪造窺著述之大凡積日既多遺編未軼

臣材

非負荷學失鑽研敬因編次之餘永志

生成之感仰塵

睿覽特弁

宸章

示雅正之攸歸許浮誇之盡謝

天褒賁寵比華袞以逾榮

帝眷垂慈逮重壚而不可前此臨書摹泐久入

鑒題今茲叢稿臚陳復經

品隲凡

聖主非常之賜實儒臣僅有之遭臣未讀父書每慚子

舍願効拜嘉之悃莫罄頌揚永懷

軫舊之仁難名叩結

臣

現將

臣

父詩文稿刊刻謹冠

御製詩于簡端俾

臣

世世子孫珍藏弄護以誌

臣

父生

平

恩遇於無既所有感激下情謹繕摺恭謝

天恩伏乞

聖鑒謹

奏

工部右侍郎臣汪承霈跪

奏竊臣父原任吏部尚書臣汪由敦所著松泉詩文

集前經臣繕本恭

進仰蒙

睿鑒

特錫宸篇

奎翰昭回藝林傳誦既曲垂夫

褒許復

申命以雕鐫

臣恪奉

絲綸謹加剞劂

天章首弁千秋欽

論定之真叢帙聯刊冊卷校編臚之舊念昔叨承

筆札成家原悉本

師資欣茲齊付棗梨印本尚冒陳

乙覽豈獨華宣刻琰銘

渥寵于非常庶期錄著崇文藉

榮光而不朽

臣

無任感悚忻忭之至謹將現在校刊之

松泉詩集二十六卷文集二十卷裝潢成冊恭呈

御覽謹

奏

欽定四庫全書

松泉集

提要

臣等謹案松泉集四十六卷

國朝汪由敦撰由敦字師茗休寧人雍正甲辰
進士官至吏部尚書謚文端是集為其子戶
部侍郎承霈所編凡詩二十六卷文二十卷
由敦嘗蒙

賜書松泉二大字因以為號併以名集承霈剗厠
成帙恭呈

御覽蒙

皇上垂念舊臣

親灑宸翰并諸簡端併

特命補入四庫全書稽古之榮於是為盛雖茂陵

賸稿特見搜求摩詰遺文優蒙批荅亦無以

加於斯矣蓋由敦詞華典雅學問淹通翔步

玉堂為文章宿老鴻篇鉅製多所手裁久直
內廷參預機密

宸章宣示皆先睹

高深凡有撰進並於

燕見從容時承

指授故能仰藉

聖訓窺見著作之淵源譬岐伯之遇軒皇而詞成
鼓吹皋陶之逢舜帝而歌鼓賡颺其生前

恩眷身後

褒榮盖有非偶然者矣乾隆五十四年二月恭校

上

總纂官臣紀昀臣陸錫熊臣孫士毅

總校官臣陸費墀

欽定四庫全書

松泉集總目

卷一

詩七十七首

卷二

詩九十八首

卷三

詩六十九首

卷四

詩三十二首

卷五

詩五十一首

卷六

詩三十八首

卷七

詩五十九首

卷八

詩八十九首

卷九

詩九十七首

卷十

詩六十三首

卷十一

詩八十二首

卷十二

詩七十八首

卷十三

詩七十七首

卷十四

詩八十一首

卷十五

詩七十三首

卷十六

詩五十九首

卷十七

詩六十四首

卷十八

詩五十六首

卷十九

詩五十八首

卷二十

詩五十六首

卷二十一

詩六十一首

卷二十二

詩八十一首

卷二十三

詩八十一首

卷二十四

詩五十四首

卷二十五

詩八十八首

卷二十六

詩五十六首

松方集總目

欽定四庫全書

松泉集卷一

起戊子至甲午

吏部尚書汪由敦撰

種慧庵偶作

讀書卧禪舍近與田園親
田園事匪一厥功分逸勤力
作候其時歲功首三春
疏畦菜甲長並隴麥秀勻
方塘漬穀種駕犂壯惟
孳健婦雜哀翁荷鍾紛如
雲終歲不得休不救數口
貧依依相勞苦禮畧意則
真默思士何

事安坐首四民偃蹇玩時日將毋愧斯人

龐眉一老叟貌古心澹漠畢生事耕稼窮老病腰脚杖
藜倚柴門徜徉暢所樂吾家萬山巔寸土盡墾鑿田少
生息繁有田沉壻惡所以逐末多四方走躩躩老叟年
八十生未離村落春及啟土膏霜晴課朝穫牆頭瓜綿
蔓籬下雞膈膊菜教稚子鋤酒呼隣翁酌且無風波虞
莫歎生計薄

黃口田家兒赤脚行步澀烏犍三兩頭驅之下原隰麾

來犢自舐浴罷耳猶濕兒也無所為坐卧綠草合望烟
就家飯占雨荷蓑笠春山蕨可採秋壑橡可拾依依親
戚前微勤力能執東隣有驕子小小在城邑菽粟且不
分但矜習拱揖

題畫冊三首

秋氣肅以清澄江曲如帶青山半有無窈窕踈林外
一徑深林杳茅屋面南山流水繞堦除何人相往還
樹色入空濛微芒辨山骨雞聲溪外聞人行霧中沒

野望

暮雲垂野濶細雨入林稀
山草隨時長溪禽自在飛
地偏宜寂寞心靜惜芳菲
徙倚東臯望歸僧歎夕扉

青衣曲

青衣初來時牀前抱小姑
小姑既抱子青衣尚無夫
洗紅溪邊石屐齒印成窪
羣魚戲清波雙禽浴圓沙

試後寄懷查頌三

鍛羽離羣此日魚書惟藥裏
思懃懃花前人遠偏勞憶

衆裏身卑祇自嫌
月黑松牕天黯淡
燈青蕭寺雨霏霰
新秋擬訂西湖約
紅藕風前颺酒帘

溪軒雜興

橫林缺處見孤村
敗壁藤扶靜掩門
人去斜陽樵路杳
鳥過遠岫暮雲繁
炊烟乍起峰腰暗
汲水爭歸渡口喧
入夜前溪渾欲失
松燈點點出平原

葛衣涼透怯西風
為愛秋光興不窮
蝶戀晚香仍款款
燕辭殘壘又匆匆
遙天欲雨山頭白
返照烘霞水面紅

何用興悲同宋玉好收新景入詩筒

阻風梵村登雲栖禪院

乍駭風濤壯扁舟雪浪衝旋攜遊屐去數里白雲封竹
暗仍留雨烟深不辨峰招尋最初地鳥語下長松

西湖四賢祠

唐宋儀型在祠開聖水濱文章三刺史風雅一山人柳
色排簷淡湖光照檻新小詩徒疥壁寤想接芳塵

東坡先生雪後書北堂壁韻和者最多戲成二首

鵲尾鑪熏歛玉纖寒威鶴訝夜深嚴
雀羣覓稻留鴻爪
童輩搏獅效虎鹽色晃銀屏看照座
林開瓊樹欲排簷
前峯飄渺來姑射不動香塵淺印尖

千山鳥絕竹藏鴉無復楓林坐晚車
烟起樓臺浮暖玉
香消簷蔔散天花敲鐘雲外知僧寺
掃徑橋邊認酒家
隱隱新梅何處覓參差石畔樹交叉

孟春十日侍家大人暨諸伯叔兄弟謁先高祖問

鄉公遺像次文學叔贊弓先生韻

像為公按江
西時十三郡

人所

奉

歲歲春盤不暫違從容羅拜燭生輝傳家清白餘霜簡
入夢分明識繡衣草徑雪消勻綠淺梅梢香暝綻紅肥
東風剪剪人如醉歸路扶攜趁落暉

過宋家洲

夾水擁長洲林樹布廣樾一片淺灘明鷗鷺點晴雪照
岸雜花香蒼莽富筍蕨蓄石集奔流豁裂魚龍窟沙崩
螺殼腥草短虎跡沒畧約如朽椽春漲每漂汨籬舍自

成村茅宇平岡結居人狎網罟叉釣隨片筏古寺隔溪
紅鐘磬上方徹石闌抱山腰樵歌半空咽修篁自陰翳
人影見恍惚捫蘿快一遊詠歸仰新月

東下

扁舟東下路漫漫幾度秋風襍被寒坐對青山遲短棹
醉乘明月過前灘鼉江浪湧魚天白廬嶺風高映日丹
惆悵曩遊旋惜別雷峯愁聽暮鐘殘

寓樓

欺人鄉思總無聊
片月孤雲影自遙
乍落帆檣辭客舫
又聽鐘梵坐僧寮
過牆色愛鄰家竹
撼枕聲驚海上潮
圖史半囊堪作伴
青燈如豆雨蕭蕭

江上

潮落平沙濶烟收遠樹疎
夕陽人候渡極浦鳥爭漁
孤槳蜻蛉舫長鞭敲鯨車
柴門斜逐岸合稱野人居

雨中登通元觀

屏跡江干倦久稽
登臨端不惜衝泥
千家碧瓦朝烟重

百雉層城古木齊雲散羽衣丹竈冷苔留鶴影石壇低
蕉牕剩有芙蓉放冒雨應邀謝客題

即事

華堂良夜若為娛絳樹新翻一串珠椽燭影搖金鑿落
茜裙光動紫羅綸行雲忽駐香塵合好月斜明綺席鋪
蓮漏沈沈擲紅豆隔牆雞唱雜啼鳥

送查大

嚴城小院聽疎砧到日微霜入柏林黃葉秋風同作客

青燈夜雨夢聯吟
文犀匣吼仍埋劍
古錦囊留未碎琴
不為離悰重回首
敝貂披處欲沾襟

雪後遊紫陽洞用石間薩雁門韻

愛雪踏徧吳山峯
雪光石影相玲瓏
月波池畔飛石磴
高低玉削千芙蓉
古洞苔青雪為屋
滴雨濺珠敲紫竹
瑤臺路近鶴不歸
洞門空鎖白雲宿

夜

螢火近西樓
新涼傍晚收
月高簾似畫
夢短簟驚秋
泣

露紅蘭老禁風白袷愁不知蕉鹿幻展轉望牽牛

登萬峯閣

袖挾天風入杳冥紆盤鳥道逼危亭雲連萬樹秋容老
海暗三山霧氣腥長嘯洞猿凌絕壁怒飛巢鵲振修翎
叩關道士猶濃睡丹鼎微溫枕玉經

登吳山作

第一峯前望眼開雪山晴捲海門來雙溪渡口魚書杳
不似江湖日兩迴

夜聽金上舍彈琴口占

鑪篆初消燭影紅
清尊人散啟簾櫳
雁飛杳杳江天白
一調瑤琴月可中

除夕雜書

細腰鼓響逼殘年
梅柳憑教漸逞妍
客況已經頻歲慣
何妨興味總蕭然

索逋鄰巷任喧阗
卧起無聊笑口開
也欲經營除夕事
送窮過了賣痴猷

燄盆爆竹一番新
出塾兒童笑語真
却訝先生未免俗
偎爐呵凍寫宜春

虛耗驅除蚤試燈
春聯帖過換門丞
酒酣盡地金錢布

十載風光憶晉陵

武進俗於除夕以粉
畫地作金錢弓矢狀

和金上舍韻

年時爰兀儘容痴
雨雪飄零且未歸
隔巷鼓喧春蚤入
故園尊暖夢都非
祭詩那得能生熟
煮字何時解療饑
剪燭通宵漫成興
不禁心事苦相違

荒疎未敢號書痴風雅於今孰與歸乍欲放懷難了了
不妨入想更非非桃人笑罵爭高下臣朔詆諧訴飽饑
且泛屠蘇夜深飲漫拈詩律論從違

早春泛湖

開戶手一編神疲目俱瞀偶命西湖舟景物恣討究湖
面冰初開鴨綠盪軟皺泛泛沙禽來桺翎屢迴味水氣
淡飛烟晴光寫雲岫春茲風日佳况據湖山秀渚梅香
微吐隄柳春已漏大塊之文章貺我亦良厚

更陟湖上山山如畫屏
矗北峯殘雪高南峯白雲宿古
寺依長林危石界飛瀑微暄亦已和蒼翠紛相屬谷口
鐘泠泠松下風謾謾清曠愜遠心窈窕引遊躅歸來紀
茲勝研山有餘綠

春詞

三五清光鬪燭銀朦朧雜沓認難真
蓮花冉冉凌波步
盡染香街十丈塵

香車轆轤慣經過挽臂兜鞵艷綺羅
照影分明嫌火樹

背人貪看鬧秧歌

風光彈指過新年
好夜難逢月再圓
漠漠春陰疑釀雨
一般心事落燈前

垂垂絲柳絮漫漫
香徑苔深未放寒
了髻村童賣花過
畫簾高揭凭闌干

春困連朝未下階
綺牕慵製踏青鞋
強邀鬪草東園去
小妹先輸瑟瑟釵

掩映紅樓柳陌西
春花纔放已成蹊
那知更有春深處

是處看花惜馬蹄

臨安災

謔謔出出妖鳥呼融風簸蕩炎官趨絳旃朱纛轟雷車
祝融下視紛紛掀掀古杭之會吾其徂古杭之會宋南都
烟火十萬環閨闔魚鱗鱗次排蝸廬雄哉夏屋何渠渠
繚垣潦草何其愚飾以堊粉中編蘆熱屬乘墉日闕闕
乘間竊發吁難逋煥赫歟若揚洪鑪頃刻鎔冶黃金鋪
倉皇列隊奔水夫長吏廣輿塞周衛轆轤長綆翻斗斛

豪門甲第富所儲
帳前銀蒜垂流蘇
妖姬驚起不及扶
顛倒紫鳳繡羅襦
藥闥威折雙春趺
蓬頭露坐那暇梳
更有寡母泣且吁
泔泔供旦夕糲旬月不滿千青蚨
上奉老姑下藐孤
連緣羅禍殃池魚祝融又瞰軍門慙
堂皇深迥安且踰
神明似昧貴賤殊
折墜乃悞平頭奴
罽毼鬱攸延構櫨
兵校左右史胥徒拱護印紱節興鉞
燭龍之而擲領珠
烏噪不已側柏枯
河伯縮伏愁天吳
使相行臺俄已墟
簋簋碎雜瓊瓊
甌中丞惴恐持官符

望風角崩禱且膜東偏傑閣度賜書其幸勿燼蒙濟濡
祝融用命迴前驅頭焦額爛嘻少甦或云麗譙巖薛形
齟齬或云拱辰橋圯城北隄鎮壓其令灰劫祛形家者
言諒不誣上章交戟公曰諏長虹一道金錢輸或者又
云吳山廟貌蒿萊蕪庀之丹竈新前除偃僂紛若用史
巫侑以椒醕神或娛我聞鶉火粲白榆火房灼灼心之
虛出納有政王者模丁壬午酉夫婦需重離之明文象
敷麗于巽木陽乃舒會城自昔形勝區磅礴鬱積鍾扶

卷一
興況乏埏埴供墜塗徙薪毋乃求良圖五行災異言紛
拏地形雜占牖而迂神遠人通捷鼓桴神豈好諛胡獻
設公孫不作子服殂瓘竿玉瓚何為乎

看山

好山如好書識者領真趣方其意得時歷歷與心遇回
眺舊峯峒橫側已非故暝晦高下殊起伏遠近赴拙哉
畫師畫落墨往往誤我欲持長箋一步一着句辭費徒
茫然語妙况難措貯此胸臆間閉門恍然悟

過丁乃清書樓

賸有餘閒作往還
每來高館俯塵寰
風光盡入三層檻
晴靄低迷幾曲山
好客坐看烟樹綠
新詩吟對夕陽殷
漫褰書幌思陳事
瓊蕊當牕手自攀

丁亥余讀書是樓
樓前玉蘭最盛

咏物

蜂

早晚放衙時
各各供所取
開房割蜜脾
甜處本辛苦

蠅

適從何處來遂致廢吾豆附驥或千里看爾十月後

蟬

森木輕颺入濃陰露光溽所托在高潔何為綴華冠

蚓

屈結泉壤下幾曲鳴自得既乖大雅音曷弗務緘默

螢

金井素月流星星撲羅扇微光能幾許草際苦自炫

蚊

成市殷雷轟叢身飛鏃集若非羅紋踈利口終難入

春湖曲

二月明湖春水新湖頭是處好嬉春
段家橋聳雪初盡白傅隄長草漸勻
眠起垂楊偏綽約夢闌啼鳥越精神
年來未慣遊間趣行過雷峯悵望頻

最好風光

御苑西宮花宮柳壓牆低月銜睥睨
鵲初放日上觚稜鶯早啼幾處飛樓
開錦繡一篙平漲徹玻璃行人指點

巡遊處曲曲長廊聽馬嘶

紙鳶高入暎雲濃偶起兒嬉踏碧峯到處放懷原少恨
舊遊回首已無蹤濛濛香霧三天竺謾謾風濤九里松
寶塔繡竿隨地現南屏鐘應鳳林鐘

錫簫吹徹寺門前寒食清明又一年浪感輕風浮淺碧
山堆濃黛染新烟卷簾嬌女乘油壁挾彈王孫試錦韉
夕照漸低南北嶺定香橋外喚歸船

松栢蔥蘢入望賒紅闌曲水定誰家蜂鬚粉退沾餘釀

燕嘴泥新帶落花粧卸峯前雲影散杯闌樓角月痕斜
開簾恰對西南路踈地垂楊映白沙

選勝青郊暫作歡杏黃衫子試輕紉韶光一半催鷓鴣
花事三分到牡丹喜放新晴憐筍屐不禁微倦倚橋闌
中流誰載笙歌舫金縷纔終日已殘

紅隄不見六萌車隄上氤氲鬪物華芳草有情承杏雨
遊絲無力冒楊花芙蓉裙衩驚眠蝶翡翠冠翹護髻鴉
為問山塘遊冶路可憐春色屬吳娃

年時幾度好風光
晝漏沉沉漸覺長
一徑落紅紛歷亂
半空飛絮太匆忙
夜深鶴舞逋仙墓
月暗鵲啼賈相莊
笑指水西清淺處
纜船曾挹藕花香

蘭皋主人索和蘭陵紀夢詩

共說東方第一流
紅蕤枕擁合歡綢
瓊厨盡飾葡萄錦
金屋長懸翡翠鉤

何必瑤臺月下逢
珮環初解洛川中
銀塘夜靜紅蓮放
不信花能似箇儂

愛畫長眉不解愁
擎來掌上號忘憂
一從喚出簾前見
淚滿榴裙總未收

坐憶名花冷繡閨
斜陽芳草又萋萋
偶隨鶯燕來香陌
認得儂家住最西

雜詩

古劍拂秋水長傍冶遊子
古鏡含精靈粧臺媚娉婷至
寶失所托知己每錯鍰何不歛
光氣君子務自貴

天馬大宛來千里一瞬息
主人愛神駿妖姬新換得玉

韞珊瑚鞭紅鞵黃金勒飛鳳映三鬢汗迸桃花色閒馳
上苑東急驟章臺陌弄影碧蹄驕迴旋逐電激雖受知
已思莫展生平力振鬣仰天嘶浮雲暗荒磧

西湖競渡詞

午月午日日卓午水馬奔騰振鼉鼓金支翠羽獵獵斜
彷彿馮夷挾風舞紛拏桂楫競盤空蜿蜒倏忽雲吞吐
簪爪之而白浪翻舴艋鱗百千聚中流畫鷁鏡奩中
五尺珠簾淡容與杏衫輕壓赤靈符艾虎斜牽長命縷

六橋濃柳新蟬沸橋上遊人薄醉語水嬉勝事盛東吳
此日招魂彷彿荆楚美人香草寄幽憂大夫日月並千古
噫嘻往事紛可數自昔孤臣遭際苦不見棲霞嶺

宋岳
鄂王

墓對三台山

明于忠肅公墓

兩代忠魂一坏土南枝鰲結閼幽

宮鐵人剝蝕埋荒莽銜哀冰上鷺鷥飛松楸寥寥神靈
雨蛟龍攫食東門蕪虎豹當關帝閭阻磷磷碧血射寒
烟岌岌雲冠委芳杜綠水青山到處愁悲歌重借離騷
譜痛飲蒲樽放棹回荷蓋亭亭隔前浦空明窈窕浸山

脚南高北高關眉嫵我乘新月作曼聲定值鮫宮弄珠
女

小游仙

金竈初成九轉丹偶然游戲駕青鸞天風吹送蓬萊館
玉洞沉沉瑤草寒

采芝前嶺值洪崖傳得神丹步玉階下界不知真訣秘
坎離龍虎強安排

三千歲後著緋桃金母親頌碧玉膏幾度花開又花落

每來池上聽雲璈

貝闕朝開謁木公三千弱水路無窮臨流不御琴高鯉
自擲長絳化彩虹

雲間邂逅董雙成並駕雌龍弄月明乘興緱山覓王子
水晶簾捲坐吹笙

符璽流金擲火鈴琅函五岳現真形間憑玉虎揮如意
位置蓬壺役五丁

雲笈苔編走螽魚娜嬛洞裡富藏書十年食盡神仙字

五色斑斕映碧虛

黃精巨勝遶華都白石丹砂擁藥鑪
欲現神通隱形去樹頭丹橘市頭壺

江行

烏桕丹楓帶夕曛歸潮送客隔灘聞
張帆直指桐廬郭不斷青山一水分

淳安

山迴過建德江曲近新安古戍依沙步
虛舟宿蓼灘烏

歸烟樹暝虎嘯石林寒三老遙憐汝村沽罄一歡

入新安界

又入新安界揚舲戒夙征雲山太古貌雞犬故鄉聲
屋並依巖架田多傍石耕縱然行役慣歸路亦關情

松泉集卷一

欽定四庫全書

松泉集卷二

乙未至丙申

吏部尚書汪由敦撰

將之武進雨中過半山戲成短歌

臨平泉水流琤琮常年遊冶爭春風
二月三月新水滑
千樹萬樹桃花紅今年雨多花較遲
橋邊竹裏三兩枝
東風笑客有底急何不留待花開時

滄浪亭用歐陽公韻

滄浪好景昔在口子美妙筆廬陵篇今來恍若舊遊地
入畫應過董巨然到門高樹發新綠平橋帶水流彎環
風流未必昔賢舊點綴臺榭猶清妍暮春三月亂飛絮
啼鶯滿耳遊蜂喧聞有落花三百本黃柑綠萼搖晴烟
苔痕如拭步碕曲怪石細路愁攀援孤亭虛敞冠高阜
酌酒便可招飛仙幽櫳更愛米家舫亭畔有小齋如舫宛若挂
席蘆溪邊小桃一枝紅粉靨菜花百頃黃金田清泉相
賞濠濮意輕儵均沫吹風漣籠紗細讀壁間記南園創

自吳越錢錢塘壯觀已消歇荒灣翠壑無人憐豈知更
落賢俊手勝地顯晦良由天當時快飲視千古失勢杯
酒如隊淵短章醉墨發豪興門無俗客惟高眠後來搜
奇誰好事西陂先生開府年嗚呼此景信幽絕不遇良
史誰為傳

題文學弟芝山乘風破浪圖

瀕洞商飈動天地飛廉急控天吳轡鼉作鯨呿墨浪高
排空萬里流雲氣此時擊楫凌蒼茫驂騑入陣超騰驤

縱橫一往實快意咄哉猛志懷宗郎吾家惠連意個儻
日賦千言邀激賞詞源近接海門潮清秋赤岸潮初上
歸篷踏破暮江烟一幅蒲帆向日懸鯉魚風緊波瀾濶
笑問前途指碧天

萬松嶺東岡多怪石詩以紀之

崔嵬萬松嶺岡帶吳山北伏脈鳳凰連奔趨女牆逼松
老摧作薪東崖富竒石向背各異狀斷削乏成式高張
聯若帷低橫限若闕靚若幽房深偃若佛龕側立若山

鬼僵蹲若陰蝨伏若駝病疥跣若鳥舒翼昂若象鼻
掀窪若馬蹄踣迤若鼈臙覆銳若犀角贅駢若列仗排
離若對岸坼峭竦逾九仞委若平地尺巨穴穿蛇虺細
碎聚螟螣露頂溫苔繡深根護荆棘將斷筋復纏欲墮
勢轉仄懸梁險能度垂足懼叵測宛轉自迴環感疊類
衣襞羅列肖萬有變眩匪一色雲開浮螺青雨過積鐵
黑凹凸古雪嵌散亂乳泉滴寒霜層冰瑩返照炬火艷
臨牕足卧遊躡屐恣登陟醉倚負曲屏趺坐代前席朋

好四五人長歎山月白孕結自何年深恐異物匿所恨
磨崖碑惡札亦深刻山靈夫何辜隱忍遭剗墨何當風
沙磨更藉雷斧劈遠驅俗士駕長遣白雲塞庶幾葆天
真敢請上帝敕

同人泛湖二首

泛艇當春晝明湖覺倍明艣搖雲葉破魚戲浪花輕遠
木晴烟淡微風宿醉清竭來勤勸客高柳坐嬌鶯
機棹近湖濱風光到眼新錦韉攀柳客繡屨采蘭人野

寺花香暖長隄燕語春絕憐桑下路細草綠如茵

大中丞長白徐公率諸生於靈隱寺祝

萬壽恭紀

聖節綿遐算嵩呼徧萬方明湖春色曙淨土梵筵張開
士金襴紫中丞玉佩蒼鷺飛龍象界虎拜鳳鸞行聯袂
從初地揚塵禮法王繡幢疑列仗寶相儼垂裳珠網縈
仙露銀繩接

帝閭祥烟飛海嶠廣樂奏松篁靈曜千秋鏡清泉萬歲

觴慈雲扶舜日花雨浥天香耿耿頻瞻

闕熙熙共擊壤小臣遙抃舞獻頌擬無疆

送秦龍光先生歸武進壽母太夫人八十

江柳送行船春帆拂曙烟言歸晉陵路將母畫堂前樂

備黃門賦詩陳太史篇

家學士叔有詩贈行

一時吳越秀百幅綵

繒懸或譽文章貴兼稱孝行全女宗人共仰慈教夙推

賢聞範潘陶並家風郝謝連杼空宵更續丸苦夜仍圓

風日暄三月春秋應八千承歡舒彩袖召客啟瓊筵青

鳥來壺嶠丹砂進僊佺揄揚真不忝祝嘏遂紛然走托
羣公末能忘向日緣客兒將應對梓里奉周全進與譚
芭列情邀孔李偏辦香歸郢削流水奏鍾絃想像虹橋
度輝煌錦悅懸高閣敞通德朱履溢光延桐發干雲秀
萱開浥露鮮顧慙巴曲陋何以頌長年

雨中過陳祖陶慧香山房

空山閉戶憶陳君坐引香光硯席分雙屐不辭頻破蘚
一尊重喜共論文小樓下見城南樹斷雨橫飛江外雲

醉裏還思借禪榻却愁鐘梵枕邊聞

寄蔣文學廷御

對君如對玉壺冰把卷同批五夜燈
鴛水一帆歸北郭

鶯花三月負西陵笑啼膝下憐嬌女

時蔣喪愛女

風雨山中憶

舊朋昨聽暮潮江上急寒鷗拍拍任飛騰

春去

客留春去兩相違
晝掩虛齋坐翠微
柳絮昏昏江漲急
梅丸累累綠陰肥
書題閨月稽鄉信
曉怯餘寒戀臘衣

風雨聲中數啼鳥杜鵑何意獨催歸

表忠觀

朱門古殿明湖曲玉座凝塵舞蝙蝠三世五王同一堂
一一英姿耀冕服斗牛占象霸圖開市中術者豫章來
勁旅摧潮八百里都兵破越窮天台閉門天子藥自作
妖鳥羅平掃如箠鐵券功名衣錦城丹青圖畫凌烟閣
楊枝曲罷天亡唐江東端不失孫郎打毬御馬于闐帶
英雄意氣何堂堂枕畔金鈴驚午夜羅刹奔潮千弩射

玉冊金符尚父名新羅渤海紛相下五百功臣息戰塵
三樓畫棟照千春牢盆海上橫戈日何意江山作主人
奕葉依然承土宇宮殿排雲事歌舞卯鼓家家按籍來
器服年年輸內府八十年來王氣消石鏡塵昏大樹凋
篋書雖滿客歸國折簡毋煩又入朝子陽季孟空雄壯
自作安豐甘退讓居人生不識干戈父老至今思保障
陌上花開緩緩歸歌聲已斷昔人非青蘋無復村農薦
芳草空留羽士悲龍山突兀餘殘照可憐異代還祠廟

階墀矗矗立豐碑，句奇語重褒忠孝。別蘇捫碑一慨然，
短牆隣竝玉津園。江外冬青纏野草，珠簾何處問通天。
送葉秀才歸臨海

孤帆搖曳碧空斜，七日征途始到家。驛路津亭頻索句，
剡溪藤染赤城霞。

水程歷盡又山程，得得驢蹄逐曉晴。灌木陰中解鞍坐，
亂蟬紛與客愁爭。

龍邱懷古

炎精昔中晦幽人抗其節矯矯龍丘萇蟬蛻卧太末聖
章拜都尉側席禮巖穴洒掃日在門功曹致藥物幡然
乘輦來大義固難絕不然傲四輔豈甘祭酒屈緬懷更
始初黜淡天地閑澤中羊裘翁一竿富春雪亦有董子
儀晦迹如一轍顧茲靜泊理師友盡賢哲為政知所先
循良寡其匹東都名節重職由尚潛逸蒲輪鬱相望冥
鴻竄羅罽豈知草昧時已見干旌了我瞻龍邱祠高並
釣壇埒願因告來茲景高著前烈金鑄任南陽清耐向

風韻

從大中丞徐公之衢州歸舟遇雨因賦

今夏麥未登澗壑集淫潦及茲復苦旱原田圻龜兆頗
聞山澤民里閭乏宿飽大府急民隱行部唁三老雙旌
駐太末興發及未殍宵氛蘊蟲蟲朝光日杲杲煩憂見
顏色齋祓默自禱迴舟過蘭溪靈雨午自卯稍快驅鬱
蒸立見起枯槁晡時油雲興霧霈復際曉預想篝車盈
百室得相保澄江霽色鮮菁蔥腴岸草帆指桐君山亭

亭立雲表

同友人步月江上作

下山日已暝烟斂暮江濶
延佇當好風素波動初月微
茫西興樹遠火漸明滅
畧師乘夜漁客舟候潮發
非偕淡蕩人寧耐清砭骨
赤壁與黃樓此樂未云闕

吳江

輕帆向晚急遠水入秋澄
烟羃漁莊柳風低蟹簫燈市
沽缸面酒盆採折腰菱
高士傳祠廟遺蹤未易徵

高淳

十里湖光淡蒲帆西又西縣門楊柳暗圩墾稻花低漁
網家家晒菱歌處處迷榜人指前路今夜宿滄溪

宣城

蒼然來暮色歸鳥敬亭雲舟楫今朝謝山程首路分此
邦多大雅詩格至今聞隱吏思梅福何時與論文

時耦
長先

生自泰順
謝病歸

過新嶺

一上青冥際迢迢嶺路長平看飛鳥過忽見遠烟蒼喬
木餘秋色亂山開夕陽迴思十年事風雨濕奚囊

雙節婦詩

予族尊行茂先公與兄子雲升公從事
粵西攝事思思死徭難茂先公妻戴氏

雲升公妻吳氏並以節著

吳孺人孫上舍紆屬賦

榛筭相弔廿年情復天空哀事請纓瘴雨蠻烟悲二阮
晨機宵火勵雙清笏山春盡花含血練浦魂飛草獨生
至竟撫孤俱不忝報劉蕙為表幽貞

贈張公子

故邑侯海寧張稚六先生子
由教童子試時出公門下

儒術雍容講藝時
盧前王後感心期
十年未脫諸生籍
一顧終慙國士知
畏壘尚餘他日淚
橫山仍結故鄉思
寒燈蕭寺無人問
憔悴西華髻欲絲

內弟查禹書上舍入粵詩以送之

相逢一笑重含辛
畫閣凝香記昔因
分手又看鄉土異
關情無那別離頻
春歸崇讓坊邊樹
燕認烏衣巷裏人
荏苒七年人事改
東亭讌罷淚盈巾

忍看風雨暗河梁
此去關河道阻長
盪漿定須勞蚤戶

金匱要略卷二
送客轉憐旋作客隨舟紅樹入錢塘
蹋歌遮莫惱珠娘孤蓬驛路同明月五夜清砧動曉霜

出門

惻惻懷遠路倚裝撰良辰中心苦徬徨上堂辭所親慈
母加我衣云是手縫紉悠悠千里行客路多苦辛三年
客臨安還歸未十旬孟冬寒以厲眠食善自珍汝父髮
頽白江湖走跋跋疲勞何時休鞠子良已勤諒無二頃
田不救四壁貧勸書冀而曹勉旃慎此身愛日足可恃

庶此懷抱伸

諸弟侍我旁淫淫淚盈眸骨月懷懽聚胡為頻遠遊遠
遊豈得已未免衣食謀日月委逝波晝夜無停流向立
百不成中夜潛百憂模範惟親仁願言潔矯修富貴非
所期榮名非所求稍冀供甘旨汝勤視帟旃孤雲行飄
飄乳鳥啼啾啾攜手別岐路淚下不可收

閨人意良勤為余烹伏雌丈夫鴻鵠翔寧願雞鶩隨自
我為君婦食貧已如飴行行嗟昔別依依悵今辭春燕

栖我梁秋月照我帷興言感時物此意古有之努力最
百行惆悵歌五噫感激四方志無為兒女悲但得尊章
歡何足縈君思

雙溪絕句七十首

有序

由敦生晉陵北郭時惟壬申首春閱十齡始隨
侍兩大人還雙溪故里尋復遊學吳越間或間
歲一歸迄今二十有五年矣其為雙溪人者才
五六年丙申秋歸自錢塘間從世父改亭先生

丁

語里中故蹟退而稍加詮次前後得詩若干首
題曰雙溪集他日行役餘閒時一省覽某邱某
水恍焉在目亦猶日撰杖於諸父老之後云爾

壘石為臺古渡頭飛甍高與翠烟浮蜀西仙令留題在
山色溪聲共一樓

村東重榭舊有額題山色溪聲共
一樓前令蜀人唐公登偶書也

雲厂雲封絕點埃枕流漱石鴈山隈誰從絲竹東山地

清簟踈簾數舉杯

鴈山在村東上有督學三餘公別業
曰漱石齋石門上篆題雲厓二字趙

凡夫筆也每九日邀先同鄉石蓮公子儀公兄
弟分韻雅集於池草閣公識詩刻石俱存武林

聞道登高梅廓好怕尋殘磴憇摩青幾回冷閣憑闌望

紅樹斜陽簇畫屏

梅廓在屏山之巔稍下為摩青館故址冷閣即漱石中傑閣也

誰遣名園駐總戎花開翻映繡旗紅牙籤零落三千卷

牆角燎

平聲

衣雜馬通

石蓮公別墅在村北董文敏題曰書種堂中有霖園朋石齋慎餘齋

多名花奇石後防守據為營尋頽廢

四宜軒敞玉玲瓏刺眼荒藤灌莽叢百丈遊絲晴裊裊

一亭紅雨晝濛濛

四宜軒在書種堂後後有大池紅雨亭跨池上池旁偏種桃花

柿葉陰濃覆小池石闌清泚染隄廡因延好客鋤三徑

更向天香折一枝

先贈御史次嶽公讀書處曰世經堂焦澹園先生所題樓前有池上植柿

樹後有竹林

今老桂尚存

達觀亭俯碧溪潄露葉松梢半畝陰薜荔扶牆門自鎖

嶽之若到任情深

達觀亭為先參議雲嶽公別業今割其半入吳氏

堂前老桂迥凌雲撲硯晴香畫郁紛拈出遺山詩更好

竹香時向靜中聞

經籬堂在達觀亭之東亦先參議公別業庭前桂極高遺山詩潭影乍從

明處見一聯家秋屏太史所摘聯句

溪上草堂橫素書溪光如練繞前除草堂灰燼流仍潔

識取源頭合問渠

余家舊有溪上草堂燬於大先大父
重建高叔祖三餘公顏以問清居尋

燬復

遊人無復問平泉零落梅花漲滿川
差勝梨園傍村尾

只餘森木亂鳴蟬

梨園在村東
舊多亭館

百尺樓高卧白雲匡牀几對斜曛
一條山帶露山笠

叫過西風雁幾羣

百尺樓在摩青山笠亭
在廬山館俱可遠眺

顏介舊傳家訓在槎潭灣去蔭安
臺思霑道暍煎香薷

竹樹千行着意栽

自廬山而西二里曰槎潭灣中途有
臺曰蔭安上有亭先戶部碩齋公施

茶處人呼為百歲亭道傍竹樹以
庇行者禁不得樵蕪見顧參家訓

無復紅亭傍曲碕半枝枯柳卧枯池屏山留得斜陽影

還似勞勞送客時

屏山之麓大坂橋
西有留亭近廢

瀛山春草碧茸茸渡口春波一色濃小婦解持桃葉楫

怕聞古寺夕陽鐘

古寺在村東繇下渡
渡溪而南曰瀛山

菜甲初肥未染黃山花到處引蜂忙行經李鵑蘭山背

不斷春風九里香

蘭山背即鵑山西路也去村二里許
曰李鵑俗謠裏屋山磬俗呼九里香

青山缺處一亭孤籬落雞豚入畫圖桃笋期過木瓜路

采菱誰泛石鯨湖

村西三里曰石鯨湖五里曰木瓜青山亭在李鴻石鯨分處

石闌如帶絡山腰燕尾波分洗市囂亭外風鐙送行客

醉乘明月渡霜橋

做雨吹晴四月天蒹洲灘上漲平川綠秧新蒔如僧衲

白鷺當人下水田

蒹洲灘在村東

潺潺曲澗不容刀派出前溪二里遙誰信地官坊下水

高官橋接太平橋

村北渠水向道地官坊南入大河顧齋公改潞由高官橋東派地官坊去

百歲坊
數武

門第從來說兩河題標雙鳳里鳴珂縱饒諸阮分南北

照道齊書世甲科

天順甲申果公登進士嘉靖甲辰柏公繼登進士建坊曰雙鳳

開元國柱冠河西擁節名從譜牒稽坊表近傳辰戌未

掃苔誰為續前題

唐徵天下望族以十六姓為國之柱河西汪氏居其一吾宗派出旌城譜

云先世多擁旌典郡故以名村先叅議公登嘉靖甲辰進士同鄉公登萬曆庚戌進士督學公登己未進士桓興公登崇禎癸未進士村西有世進士坊

春暉堂上散朝暉世德曾高駟馬門百歲家庭傳盛事

產文孫又產文孫

九世祖年百歲封戶部公父也自叅議公至同鄉公督學公兄弟皆再世

通籍禮垣邵公庶庚戌贈言有產文孫復產文孫賜進士又賜進士之語春暉堂封戶部公別業在槎潭

述祖長哦謝監詩通都百番播烏絲祇憐白髮徵文獻

暝寫晨鈔付阿誰

明經廬山公有述祖德長律刻於臨安眉生叔祖撰世徵錄網羅先世遺

文凡七冊冊寸許今已散佚

勝友傳柑臘醞黃儲英高會丈人行只今誰復思耆舊

人日題詩舊雨堂

先祖聯里中耆宿每歲人日九日登高置酒曰儲英會先叔文學思思公

興懷執友有人日呈家改亭伯詩舊雨堂叔小款所署也

誰擅登高作賦才靈珠荆壁鬪玫瑰廣筵待月分題處

排闥空青四面來

里中向有文會中廢叔祖侍郎涵齋公重興初會於來青書院釋奠子朱

子定期上元後二日

集諸文士分題課藝

月明不上庾公樓良夜追歡泛四遊金縷曲終雲不散

浣紗的的在溪頭

賢學三餘公有小湖舫題曰四遊圖叔秋屏太史亦製秋水篇明月句其

船聯也賢學公家鶴珠小伶擅名浙中先曾祖畜小伶善演浣紗劇

家伶兩部管絃張一曲當筵也擅場驅犢歸來坐春雨

更教兒輩理宮商

先封戶部公好絲竹先叅議公教家僅清歌娛老一部居槎潯一部居瓜

園至今世其業

舊社蘭亭最擅名中含

戴諱一美

五瑞

吳諱錫圭

與雲卿

吳諱文漢環

中

吳諱廷樞

以後推公素

吳諱文煒

狂草懷公楷率真

里中善書者結蘭亭

社始於明神熹間諸子尤傑出公素翁與家大人交契

子還里時年已八十餘矣猶臨醴泉帖見貽近來吾鄉

榜署多出其手

畢家住接冬青樹名姓曾傳淡墨書十二乙科九進士

雲仍閭閻近何如

畢氏昔為里中著姓所列世科坊自天順壬午至嘉靖丁酉登賢書者十

二人進士九人今其

子孫多散徙他邑

先生烏角躡芒屨御院除人早授階壺裏有天春尚滿

苦吟誰識杏花齋

里人金太醫有奇精岐黃先同卿公贈以春滿壺天匾額所著杏花齋詩

不傳

錦石中流荇藻緘金龜不羨紫泥函蛟螭蚪蚪從人辨

山水平章別署銜

溪底有大方石獅印石

溪光淼淼樹騷騷雲影風淪映彩毫誰寫新詩坐相對

紫金浮玉一痕高

溪中有石浮出水面獅筆架石紫金浮玉老米研山也

叢桂香時似熟梅闌風吹雨過溪來曉鋪穀簟頻南望

羊棧烏雲開未開

羊棧尖在溪南最高其上有雲則雨

大連小連水淙淙杭埠春流擁客艤灘外有灘三百六

送君直到富春江

浙江源于張公山之北高湖尖出大連小連至梅口會梅溪孚溪之水東

流百二十里至吾村會發源水達屯溪會縣港流出浦口為新安江自吾村登舟經三百六十灘直抵錢塘故

渡頭名杭埠

三三五五去尋春坐愛飛泉雨後新一塢桃花開似錦

殘紅幾片出西津

溪南桃花塢花頗繁所謂南澗飛泉即其地也

雙溪春漲通行舟多半丁年事遠遊昨日高堂喜聞鵲

信來傳已過杭州

新詞撒帳祝宜男
絳蠟雙行耀枕函
廚下羹湯明日試
袖中榛栗小郎探

子姓祠堂正旦開階前羅拜
藉莓苔紅襦抱去兒童喜

接得金花餅餤來

元旦祠中團拜人
給金花餅二枚

試燈時節鼓聲譁
隊引香輿護墨紗
好待一溪明月滿

紫滕前去看銀花

俗於上元時賽神神每夜遊街紗輿
中可列燭雜繪其外望之如燈屏棹

人吳氏花
蛇最佳

斑駁豐碑記宋年
掃除猶及禁烟前
墓門躑躅紅如血

風雨飄零白紙錢

吾鄉祭掃最重寒食雖宋時古瑩不廢

焙茶烟起漾晴暉
篁竹陰中筍乍肥
綠樹曉啼春去了

麥鬚風暖燕雛飛

三四月間有山鳥晝夜啼不止其聲曰春去了人謂即杜鵑

糗餌新陳按節添
山鄉風味試香甜
青精飯熟流匙滑

蜜蠟烝黃角黍粘

四月八日造青精飯端午包角黍以灰汁澆米者色嫩黃可愛

六十日私纔上市
薦新家廟飯炊香
棗梨瓜藕陳肴核

不托油煎半糝糖

早禾六十日而熟中元俗尚油糝

包子團團月下分
杯浮桂醕客微醺
凌空忽訝龍鱗動

一道香烟瀟白雲

中秋俗尚月餅小餠頭兒童綺草裊香為龍狀羣擎舞以相樂

泥金槿子壓肩挑餽歲紛紛節物饒髻約紅絲花簇髻

兒家來處是花橋

歲時餽遺皆以女使為信花橋去吾村西南二十里

菜把分張早上村露苗霜甲滿瓜園平溪漲沒難充膳

苦苣青青馬齒繁

瓜園在村東里許居人以菜畦為業

宋家洲外成籃賣烏密紅脣碧玉螺只有消寒誇臘味

鹽鮮上市醉新醪

宋家洲居人業漁烏密細鱗紅脣長嘴皆溪鮮之美者青螺生溪中石上

四時有之春初最盛冬月產鹽鮮魚多自池上販來味亦好

食貨從教貴賤徵銀歸質庫色無憑交租昨幸叨餘粒

一任清華米價騰

清華街在婺源縣境吾鄉食糧皆仰給於此

溪邊春事鬧芳華歌管頻催月影斜人壓看場沾薄醉
紅燈零亂奏琵琶

京譜新翻色樣工閒情半在竹林中小牕聽雨消殘晝
笑拍烏皮散六紅

中庭客至旋呼茶末麗朱闌未足誇雪枕青浮薄荷葉

銀匙紅點葛精花

俗用末麗珍珠蘭窰茶暑天淪以薄荷又染葛粉作小花餅點之

小姑大姑采新茶草露濃沾藕覆花何似水鄉蠶葉市
燕梢如織載還家

三時農婦最辛勤布笠仙仙眉綠雲手轉桔槔如拱揖

半畦新溜大塘分

田家婦用青布裹竹園子為笠穴其中以露髻大塘瀦水溉田在村之北

田干千畝間高低劇愛秋闌夕眺迷蕎麥花開白於雪

稻孫新長聚黃雞

漫拈食品惱廚娘映字曾聞說餅方麵掛銀絲千縷細

羹調玉糝十分香

餅可映字見清異錄吾鄉春餅其薄如紙銀絲細麵明曾進御大官

廳事名從別駕傳隼礪分鎮記當年烏紗皂蓋行春去

屏繞青山紫繞烟

前制以溪口為徽饒街道設上溪分署郡倅移駐馬後仍轄郡城廨亦傾

圯

弓兵村外畫鳴鶻鈴柝宵傳應遠郊一夜雪飛深沒踝

繞籬虎跡落山坳

上溪口汎百夫長一人帥步卒戍焉葺三府廳遺址為營舍

將軍七騎建功奇猛虎山前入夢時欲奏迎神送神曲

衝風凍雨閃靈旗

村北大坂橋闔壯繆祠神最著靈傳聞有山寇夜猝至防守田某者夢神

促之起乃以七騎禦于石湖斬獲甚衆

竹柏蕭森種慧庵梅檀香樹供瞿曇篝燈小閣匡廬夢

朶朶慈雲護法龕

村東二里為種慧庵中有梅檀佛左餘思閣奉先同卿公西江生像己丑

庚寅間予兄弟讀書閣中庵外為邑西孔道有亭施茶庵僧主其事

大道楓林朔吹悲東臯迤邐雜歲蕤更無人酌清明酒

雨蝕風磨義士碑

村東道傍有碑浸滅不可辨人皆呼為義士碑

石髮侵階祇樹林瓣香真印妙明心合移孝子祠中住

山磬泠泠寫梵音

祇林庵金子駿太史室女焚修處周孝子祠亦女僧庵在村西杭埠嶺

步虛聲出白雲隈象簡朝真日幾迴丹竈苔封雞犬去

天風吹下小蓬萊

李鴻栖雲庵又名小蓬萊

紅筵醉客暗香迷曲館花深有鳳栖燕麥兔葵隨地長

夜烏依舊隔牆啼

鳳栖館

松楸一徑入雲低寸草經春綠意齊試望荒村狐兔宅

北邙山外夕陽迷

桐木塢寸草山房叅議公廬墓處又同卿公封母吳太夫人置義塚在石

坑玉尺山下相望數里許

青鞵遍踏燕泥融風亂垂鬟語未通斤竹嶺前聯袂去

蘭蘭薺菜滿筠籠

斤竹從村北去二里蘭薺是小草見唐人詩俗呼馬薺

揉籃溪水色溶溶紅屐能留石上蹤
花發愛蓂春不老

鳥飛羨煞巧相逢

春不老紅花巧相逢山鳥名

西山暝色喜蓬牕映水松杉似列幢
欸乃一聲山月白

沙禽驚起自雙雙

石竭

方言作平聲音同花

橫截水濺濺水碓風輪疾轉園茅舍夜

春雲子白前灘新攏木瓜船

吾鄉操舟者類多木瓜洲人

桐廬小艇漸江來百丈齊懸七尺桅
青笠裹鹽爭取酒

沙頭圍坐賭雙杯

千家烟火水彎環四面雲林擁翠鬟若為雙溪圖十景

晴嵐霽雪傲荆關

舊傳雙溪十景曰華嶺樵歌蕨洲牧笛瀛山釣月辛野耕雲南澗飛泉西

津古渡茶潭夜棹古寺晨鐘羊棧晴嵐秀峯霽雪

松泉集卷二